


井
上
文
四

C40
4514
(118)



C40-4514



B 64853

妙法蓮華經綸貫

古吳藕益道人智旭述

妙法蓮華經者諸佛究竟之極談也。原夫釋迦牟尼
如來實成佛道以來已經不可思議阿僧祇劫。為度
衆生無有休息。數數示生。數數示滅。未種善根者。令
種善根。已種善根者。令其成熟。已經成熟者。令得解
脫。所有法味不出藏通別圓等四種。所有化儀不出
頓漸秘密不定等四種。且據此番八相成道說法四
十九年。略為五時。初坐菩提道場。為大根衆生說大

乘法名第一華嚴時于化儀爲頓譬如日出先照高山又如從牛出乳于化法爲圓兼別圓被界外利根別被界外鈍根此則小機絕分不見不聞所以不動寂場而遊鹿苑爲五比丘等說四諦法詮生滅理及說十二因緣事六度等名第二阿含時于化儀爲漸之始譬如日照幽谷又如從乳出酪于化法爲藏但被界內鈍根令其轉凡成聖次借維摩等諸大士互相酬唱彈偏斥小歎大褒圓名第三方等時于化儀爲漸之中譬如食時又如從酪出生酥于化法爲四

教並談對半明滿藏爲半字教通別圓爲滿字教使利根得滿益鈍根得半益先成聖者密得通益次與四大弟子共轉法輪會一切法皆摩訶衍名第四般若時于化儀爲漸之終譬如禺中又如從生酥出熟酥于化法爲帶通別正明圓教使界內機得通教三乘共般若益界外機得別圓不共般若益先成聖者密得別益次乃於靈山會上開權顯實開近顯遠名第五法華時於化儀爲會漸歸頓亦名非頓非漸譬如日輪當午大地普照罄無側影又如從熟酥出醍

醍醐于化法爲純圓。無有一人不得作佛。出世本懷。于茲始暢。舉凡如來化度衆生之方便施設教網之弘綱。咸于此經開發顯示。所以獨名爲妙。至於涅槃律談常不過曲爲末世鈍根重施方便。令同會真實耳。其秘密不定二種化儀。徧在前之四時。惟法華是顯露。非秘密是決定。非不定也。此經靈山演說。凡有八年。貝葉傳持。積至八里。流入震旦者。凡有三譯。今鳩摩羅什所譯共七卷。二十八品。自古註家紛紛不一。或簡或繁。莫得真要。惟天台智者大師初見南嶽

慧思大師于光州大蘇山。思授以普賢道場。令修法華三昧。誦經至藥王菩薩本事品。是真精進。是名眞法供養。如來豁然大悟。寂而入定。親見靈山一會儼然未散。獲一旋陀羅尼。自是以後。照了法華如臍和之臨萬象。達諸法相似清風之遊太虛。遂以五重玄義解釋總題。章安尊者記成玄義十卷。復以四意消釋經文章安尊者記成文句十卷。言五重玄義者。一法喻爲名。二實相爲體。三一乘因果爲宗。四斷疑生信爲用。五無上醍醐爲教相也。言四意消文者。一因

緣。二約教。三本迹。四觀心也。消文浩博未暇委悉。今略出五重玄義。一法喻爲名者。妙法二字。謂之法。蓮華二字。謂之喻。法者略而言之。衆生法。佛法。心法也。妙者。略而言之。相待妙。絕待妙也。經云。爲令衆生開示悟入佛之知見。若衆生無佛知見。何所論開。當知佛之知見。蘊在衆生。故衆生法妙也。佛法不出權實。經云。是法甚深妙。難見難可了。一切衆生類。無能知佛者。卽是歎實智妙。又云。及佛諸餘法。亦無能測者。卽是歎權智妙。惟佛與佛。乃能究盡諸法實相。諸法

是卽實之權實相。是卽權之實。故佛法妙也。安樂行品云。修攝其心。觀一切法。不動不退。普賢觀云。我心自空。罪福無主。觀心無心法。不住法。淨名云。觀身實相。觀佛亦然。諸佛解脫。當于衆生心行中求。華嚴云。心佛及衆生。是三無差別。故心法妙也。相待妙者。待半字爲麤。明滿字爲妙。三藏但半字生滅門。不能通滿理。故麤。滿字是不生不滅門。能通滿理。故妙。又方等般若帶方便通滿理。故麤。今經直顯滿理。故妙。絕待妙者。說無分別法。卽邊而中。無非佛法。亾泯清淨。

無復有法可相形比待誰爲麤形誰爲妙無所可待亦無可絕不知何名強言爲絕妙名不可思議不因手麤而名爲妙若謂獨有法界廣大獨絕者此則大有所有何謂爲絕今法界清淨不可以待示不可以絕示滅待滅絕故言寂滅用是兩妙妙上三法衆生之法亦具二妙佛法心法亦具二妙故稱妙法又廣釋妙者有迹門十妙本門十妙觀心十妙迹門十妙者一境妙二智妙三行妙四位妙五三法妙六感應妙七神通妙八說法妙九眷屬妙十功德利益妙實

相之境非佛天人所作本自有之非適今也故居最初迷理故起惑解理故生智智爲行本因于智目起于行足目足及境三法爲乘乘于是乘入清涼池登於諸位位何所任任于三法秘密藏中任是法已寂而常照照十界機機來必應若赴機垂應先用身輪神通駭動次以口輪宣示開導既霑法雨稟教受道成法眷屬拔生死本開佛知見得大利益前五約自行因果具足後五約化他能所具足經云惟佛與佛乃能究盡諸法實相所謂諸法如是相如是性如是

法華轉頁
五
體。如是力。如是作。如是因。如是緣。如是果。如是報。如是本末究竟等。卽境妙也。我所得智慧微妙第一。以此妙慧求無上道。卽智妙也。本從無數佛具足行諸道。行此諸道已。道場得成果。佛子行道已。來世得作佛。卽行妙也。天雨四華。表任行向地。開示悟入。亦是位義。乘是寶乘。遊於四方。直至道場。四方是因位。道場是果位。卽位妙也。佛自住大乘。如其所得法。定慧力莊嚴。大乘。卽真性軌定。卽資成軌慧。卽觀照軌。是三法妙也。于三七日中。思惟如是事。我以佛眼觀

見六道衆生等。卽感應妙也。入定雨華動地放光等。卽神通妙也。其說法皆悉到于一切智地。已今當說。最爲難信難解等。卽說法妙也。但教化菩薩。無聲聞弟子。卽眷屬妙也。現在未來若聞一句一偈。我皆與授阿耨多羅三藐三菩提記。須臾聞之。卽得究竟三菩提。不令一人獨得滅度。皆以如來滅度而滅度之。卽功德利益妙也。本門十妙者。一本因妙。二本果妙。三本國土妙。四本感應妙。五本神通妙。六本說法妙。七本眷屬妙。八本涅槃妙。九本壽命妙。十本利益

法華經疏
妙。本因妙者。本初發菩提心行菩薩道所修因也。若十六王子。在大通佛時弘經結緣。皆是中間所作。非本因也。過是塵點劫前所行道者。名本因妙。本果妙者。本初所行圓妙之因。契得究竟常樂我淨。乃是本果。不取寂場舍那成佛爲本果也。但取成佛以來甚大久遠初證之果。名本果妙。本國土妙者。本既成果。必有依國。今既迹在同居。或在三土。中間亦有四土。本佛亦有四土。復居何處。文云。自從是來。我常在此娑婆世界說法教化。按此文者。實非今日迹中娑婆。

亦非中間權迹處所。乃是本之娑婆。卽本土妙也。本感應者。既已成果。卽有本時所證二十五。三昧。慈悲誓願機。感相關。能卽寂而照。故言本感應也。本神通者。亦是昔時所得無記化化禪。與本因時諸慈悲合。施化所作神通駭動可度衆生。故言本神通也。本說法者。卽是往昔初坐道場始成正覺。初轉法輪。四辯所說之法。名本說法也。本眷屬者。本時說法所被之人。如下方便者。彌勒不識。卽本之眷屬也。本涅槃者。本時所證斷德涅槃。亦是本時應處同居方便二

法華經疏
上有緣既盡唱言入滅。卽本涅槃也。本壽命者。既唱入滅。則有長短。遠近壽命也。本利益者。本時眷屬所獲諸功德也。觀心十妙者。迹門本門。皆論觀心。迹門觀心。散在諸文。本門觀心者。佛如衆生如。一如無二。如。佛既觀心得此本妙。迹用廣大。不可稱說。我如如佛如。亦當觀心。出此大利。亦願我如速如佛如。故文云。聞佛壽無量。淡心須臾。信其福過于彼。願我於未來。長壽度衆生。如今日世尊。諸釋中之王。道場師子吼。說法無所畏。我等於未來。一切所尊敬。坐於道場。

時說壽亦如是。此卽觀心本妙。得六卽利益之相也。次明蓮華者。譬喻妙法也。華有種種。或狂華。無果。可喻外道。空修梵行。無所尅獲。或一華多果。可喻凡夫。供養父母。報在梵天。或多華一果。可喻聲門。種種苦行。止得涅槃。或一華一果。可喻緣覺。一遠離行。亦得涅槃。或前果後華。可喻須陀洹。却後修道。或前華後果。可喻菩薩。先藉緣修。生後真修。此皆麤華。不可以喻妙法。惟此蓮華。華果俱多。可譬因合萬行。果圓萬德。又爲蓮故。華華實具足。可喻卽實而權。華開蓮現。

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

可喻卽權而實。華落蓮成。蓮成亦落。可喻非權非實。故以蓮華喻于妙法。又以此華喻迹。本兩門各有三喻。迹門三者。一華生必有於蓮。爲蓮故華。而蓮不可見。此譬爲實施權。意在於實。無能知者。二華開蓮現。而須以華養蓮。譬權中有實。昔無人知。今開權顯實。意須於權。廣識恒沙佛法者。祇爲成實。使深識佛知見耳。三華落蓮成。譬廢權立實。唯一佛乘。直至道場。菩薩有行見不了了。但如華開。諸佛以不行故見則了了。譬如華落蓮成也。本門三者。一華必有蓮。譬迹

必有本。迹合于本意。雖在本。佛旨難知。彌勒不識。二華開蓮現。譬開迹顯本。意在於迹。能令菩薩識佛方便。既識迹已。還識於本。增道損生。三華落蓮成。譬廢迹顯本。既識本已。不復迷迹。但於法身修道圓滿。上地也。又經中凡有七喻。皆喻權實。今以蓮華而總喻之。七喻者。一火宅中三車。一車喻以三車喻權。大白牛車譬實。二信解品中窮子喻。以雇作譬權。付業譬實。三藥草喻。以三草。二木譬權。一地譬實。四化城喻。以作化譬權。寶處譬實。五授記品繫珠喻。以少有所

法華經疏
九
得譬權實珠貿易譬實。六安樂行品輪王喻。以隨功
賞賜譬權。解髻明珠譬實。此六皆迹門開權顯實喻
也。七壽量品中良醫喻。以使告父死譬權。來歸使見
譬實。此卽本門開近顯遠喻也。更有王饜鑿井二喻
既非全譬。一期開顯。所以智者大師略而不舉。後世
輒云九喻可謂依文不依義矣。經者佛所說法之通
名也。梵云薩達磨芬陀利修多羅。薩達磨此翻妙法。
分陀利此翻蓮華。具如前釋。此名異於衆典。故稱爲
別。一代時教皆名爲修多羅。故稱爲通修多羅。或翻

爲經。或翻爲契。或翻爲法本。或翻爲線。或翻爲善語
教。或云無翻而含五義。一法本。亦云出生。二微發。亦
云顯示。三涌泉。四繩墨。五結鬘。就此翻五合五。各具
教。行理三。教卽世界悉檀。行卽爲人對治二種悉檀。
理卽第一義悉檀也。又此方聖說爲經。經者訓法訓
常。法以軌持爲義。教可軌。行可軌。理可軌。故名爲法
常者不變爲義。天魔外道不能改壞。卽教常。真正無
雜。無能踰過。卽行常。湛然不動。決無異趣。卽理常也。
二實相爲體者。經云。今佛放光明。助發實相義。又云。

諸法實相義已爲汝等說。又云。惟佛與佛乃能究盡諸法實相。又云。諸佛法久後要當說真實。又云。我以相嚴身爲說實相印。又云。開方便門。示真實相。又云。觀諸法實相。故知諸佛爲一大事因緣。出現於世。祇令衆生開佛知見。見此一實。非因非果之理耳。三一乘因果爲宗者。此經始從序品訖安樂行品。破廢方便。開顯真實佛之知見。亦明弟子實因實果。亦明師門權因權果。文義雖廣。撮其樞要。爲成弟子實因實果。因正果傍。故於前段明迹。因迹果也。從涌出品訖。

勸發品發迹顯本。廢方便之近壽明長遠之實果。亦明弟子實因實果。亦明師門實因實果。而顯師之實果。果正因傍。故於後段明本。因本果也。四斷疑生信。爲用者。迹門用佛菩提。二智斷七種方便最大無明。同入圓因。本門破執近迹之情。生於本地。深信乃至等覺。亦令斷疑生信也。五無上醍醐爲教相者。五時譬喻略如前說。若華嚴初逗圓別之機。高山先照。直明次第。不次第修行地上。佳上之功德。不辯如來說頓之意。若四阿含通說無常。知苦斷集。證滅修道。不

法華經疏
明如來曲巧施小之意。若諸方等折小彈偏。褒圓歎大。慈悲行願。事理殊絕。不_レ明_レ並_レ對_レ訶_レ讚_レ之意。若般若共則三人同入。別則菩薩獨進。廣歷陰入。盡淨虛融。亦_レ不_レ明_レ共_レ別_レ之意。若涅槃在後。略斥三修。粗點五味。亦_レ不_レ委_レ說_レ如_レ來_レ置_レ教_レ原_レ始_レ要_レ結_レ之_レ終_レ。凡此諸經皆是逗會他意。令他得益。不_レ譚_レ佛_レ意_レ趣_レ何_レ之_レ。今經不_レ爾。舉凡法門綱目。大小觀法。十力無畏種種規矩。皆所不論。爲前經已說故。但論如來布教之元始。中間取與漸頓適時。大事因緣。究竟終訖。當知此經惟論設

教大綱。不_レ委_レ微_レ細_レ綱_レ目_レ。譬如算者。初下後除。紀定大數。不_レ存_レ斗_レ斛_レ。祇爲_レ深_レ論_レ聖_レ教_レ妙_レ說_レ聖_レ心_レ。近會圓因。遠申本果。所以請疑不已。若能精知教相。則識如來權實二智也。經文二十八品。智者大師分爲三分。初品爲序。方便品訖。分別功德十九行。偈凡十五品半。各正宗。從偈後盡經凡十一品半。名流通。又一時分爲二。從序至安樂行十四品。約迹開權顯實。從涌出訖。經十四品。約本開近顯遠。本迹各序。正流通。初品爲序。方便訖。授學無學人記品爲正。法師訖。安樂行爲

法華經疏
流通涌出訖彌勒已問斯事佛今答之半品爲序從
佛告阿逸多下訖分別功德品偈爲正此後盡經爲
流通初序有通有別通則總冠兩門別則發起三周
正說後之流通有勸持有囑累勸則別約本門囑則
通囑全部大經迹門後五品但是勸持迹門本門初
序分但是發起本門初序品者次也由也述也如是
等六義證信冠於經首次序也放光六瑞發起之端
由序也問答釋疑正說弄引敘述也故名序品次方
度品以下凡有三周說法今方便品作三乘一乘說

名法說一周上根得悟授舍利弗記次譬喻品作三
車一車說名譬說一周中根得悟授四大弟子記次
化城喻品明宿世結緣事竟重作三百由旬五百由
旬說名因緣說一周下根得悟授五百及二千人記
此卽迹門開權顯實之正宗也言方便品者略爲三
解一曰方者法也便者用也善用偏法巧逗衆生名
爲方便此可釋他經非今品意二曰方便者門也門
名能通通於所通方便爲真實作門真實得顯功由
方便此亦可釋他經非今品意三曰方者秘也便者

妙也。妙達於方。卽是真秘點內。衣裏無價之珠。與王頂上。惟有一珠。無二無別。指客作人。是長者子。亦無二無別。如斯之言。是秘是妙。正是今品意也。此品正開三乘之權顯一乘之實。於中有略。有廣。略則動執生疑。廣則斷疑。生信。畧中要旨。不出唯佛與佛。乃能究盡諸法實相數語。乃一經之弘綱衆義之淵府。南嶽大師約義三轉讀之。一者是相如是性。如乃至是報如。如名不異。卽空義也。二者如是相。如是性。乃至如是報。點空相性名字施設。迥邈不同。卽假義也。三

者相如是性如是。乃至報如是。如於中道實相之是。卽中義也。分別令易解。故明空假中。得意爲言。空卽假中。約如明空。一空一切空。點如明相。一假一切假。就是論中。一中一切中。非一二三。而一二三。不縱不橫。名爲實相。唯佛與佛。究盡此法。是十法攝一切法。智者大師復約四番釋之。一約十界。二約佛界。三約離合。四約位。一約十界者。謂六道四聖也。法雖無量。數不出十。一一界中。雖復多派。不出十如。如地獄界。當地自具相性本末。亦具畜生界相性本末。乃至具

佛法界相性本末。無有缺減。當知一一界皆有餘九界十如。若照自位九界十如皆名爲權。照其自位佛界十如名之爲實。一中具無量無量中具一。所以名爲不可思議。凡夫雖具絕理情迷。二乘雖具捨離求脫。菩薩雖具照則不周。名不了了。如來洞覽橫豎具足。二約佛法界釋者。佛界非相非不相。而名如是相。指萬善緣因。故下文云。衆寶莊較。佛界非性非不性。而名如是性。指智慧了因。故下文云。有大白牛。佛界非體非不體。而名如是體。指實相正因。故下文云。其

車高廣。佛界非力非不力。而名如是力。指菩提道心。慈善根力等。故下文云。又於其上張設憶蓋。佛界非作非不作。而名如是作。指任運無功用道。故下文云。其疾如風。佛界非因非不因。而名如是因。指四十一位。故下文云。乘是寶乘。遊于四方。佛界非緣非不緣。而名如是緣。指一切助菩提道。故下文云。又多僕從而侍衛之。佛界非果非不果。而名如是果。指妙覺朗然。圓因所尅。故下文云。直至道場。佛界非報非不報。而名如是報。指大般涅槃。故下文云。得無量無漏清

法華經疏 卷第五
淨之果報。佛界非本非末。而言本末。本卽佛相。末卽佛報。是自行之權。佛界非等。非不等。而言究竟等。指於實相。是自行之實。卽實而權。故言本末。卽權而實。故言爲等。三約離合者。若佛心中所觀十界十如。皆無上相。乃至無上果報。惟是一佛法界。如海總萬流。千車共轍。此卽自行權實。若隨他意。則有九法界十如。相性等。卽是化他權實。化他雖復有實。皆束爲權。自行雖復有權。皆束爲實。此卽自行化他權實。隨他則開隨自則合。橫豎周照。開合自在。四約位釋。如是

相者。一切衆生皆有實相。本自有之。乃是如來藏之相貌也。如是性。卽是性德智慧第一義空也。如是體。卽是中道法性之理也。是爲三德。通十法界。位位皆有。若研此三德。入於十信位。則名如是。力如是。作。入四十一位名如是。因如是。緣。若至佛地名如是。果如是。報。初三名本。後三名末。初後同是三德。故言究竟等也。廣開三顯一中。雖徧引十方三世佛佛道同。總不出於四一。所謂理一人二行。一教。一理。一者。約開示悟入佛之知見明之。復約四意。一約圓位。二約圓

法華經疏
智三約圓門。四約觀心。一約圓位者。開卽十住。初破無明。開如來藏。見實相理。示卽十行。惑障既除。知見體顯。體備萬德。法界衆德。顯示分明。悟卽十迴。向障除。體顯。法界行明。事理融通。更無二趣。入卽十地。事理既融。自在無礙。自在流注。任運從阿到荼。入薩婆若海。然圓道妙位。一位之中。卽具四十一地功德。祇開卽具示悟入等。更非異心。但如理知見。無有分別。淺深之相。欲顯如量知見。故分別四位耳。二約圓智者。一道慧見道實性。實性中得開佛知見。二道種慧

知十法界諸道種別解惑之相。一一皆示佛知見。三一切智知一切法。一相寂滅。寂滅卽佛知見。四一切種智。知一切法。一相寂滅。相種種行類相貌。皆識卽入佛知見。又道慧如理名開道種慧。如量名示一切智。理量不二稱悟。一切種智。理量雙照爲入。此亦約實理。無淺深中。而淺深分別也。三約圓教四門橫釋四句者。空門。一空一切空。卽開佛知見也。有門。一有一切有。卽示佛知見。亦空亦有門。一切亦空。亦有卽佛知見。非空非有門。一切非空非有。卽入佛知

法華經疏
見能通則四。所通則一。開示悟入。是能通之門。所知
所見。是所通之理也。四約觀心釋者。觀於心性三諦
之理。不可思議。此觀明淨爲開。雖不可思議。而能分
別空假中心。宛然無濫。名示。空假中心。卽三而一。卽
一而三。名悟。空假中心。非空假中。而齊照空假中。名
入。是爲一心三觀。而分開示悟入之殊也。所以四種
釋者。見理由位。位立由智。智發由門。門通由觀。觀故
則門通。門通故智成。智成故位立。位立故理見。見理
故名爲理一也。諸佛如來。但教化菩薩。卽是人一。諸

有所作。常爲一事。卽是行一。但以一佛乘。故爲衆生
說法。卽是教一。此之四一。徧會昔日權理。權人。權行。
權教。成今實理。實人。實行。實教。故名開權顯實。妙達
於方。卽是真秘也。第三譬喻品者。比况名譬。曉訓名
喻。托此比彼。寄淺訓深。前文法說一周。上根獲悟。中
下之流。抱迷未遣。大悲不已。巧智無邊。借世間父子。
以况出世師弟。借火宅。以喻三界。借三車。一車。以喻
三乘。一乘。故名譬喻品也。第四信解品者。中根聞譬
說一周。信發解生。疑去理明。乃自陳窮子之喻。領上

法譬二周之旨也。第五藥草喻品者。土地是能生。雲雨是能潤。草木是所生。所潤。所生。所潤。通皆有用。而藥草用強。喻有漏諸善。悉能除惡。而無漏爲最。無漏衆中四大弟子。以譬領佛。譬深會聖心。佛故述成。而推廣之。第六授記品者。梵語和伽羅。此云授記。又云受記。受決。受蒞。授是與義。受是得義。記是記事。決是決定。蒞是了蒞。此卽授中根四人成佛記也。第七化城喻品者。無而歎有名。化防非禦敵。稱城以喻二乘。涅槃乃如來權智所爲也。以權智力。無而說有。用教

爲化。防思禦見。名爲涅槃。若藏通二乘。生安隱滅度。想不知是化。通教菩薩入而還出。亦不知是化。別教從城門徑過。不以爲極。亦不說是化。惟圓教知無賊病。亦不須城。故言化城。此正爲下根人作。夙世因緣說一周也。第八五百弟子受記品。第九授學無學人記品。卽是普與下根。授記作佛。迹門正宗齊此。此下有五品流通。法師寶塔。兩品明弘經功深福重。流通未聞利益巨大。達多一品。引往弘經。彼我兼益。以證功德深重。持品八萬大士。忍力成就者。此上弘經。新

法華經疏 七九
得記者他土弘經安樂行品以外凡初心欣斯勝福見聲聞畏憚聞菩薩損辱顧已力弱無益自他便生退沒佛爲此人說安樂行依之弘法不慮危苦又法師品釋尊自說弘經功福命覓流通寶塔品多寶及分身佛且證且助勸覓流通今第十法師品法者軌則也師者訓匠也法雖可軌體不自弘通之在人五種通經皆得稱師舉法成其自行皆以妙法爲師師於妙法自行成就故言法師又以妙法訓匠於他故舉法目師名爲法師文中先歎美五種法師能持法

人一受持二讀三誦四解說五書寫後歎美所持之法及示通經方軌所謂入如來室著如來衣坐如來座如來室是大慈悲若就同體卽法身也若被衆生卽是解脫能令衆生會於同體卽是般若如來衣者若就所覆卽法身也若就能覆嚴身卽寂滅忍也若就和光利物卽解脫也如來座者若就能坐卽般若也若就所坐卽法身也身座冥稱卽解脫也雖復各具祇是一三三尚非三豈離爲九是則菩薩常觀涅槃故勸弘經者而常觀之不觀能弘之心焉曉所弘

之理。故佛令我室著我衣坐我座。若無三法。何謂
弘經。第十一見寶塔品者。多寶佛從地湧出。大眾
咸見。發大音聲。以證前集佛開塔。以起後也。第十二
提婆達多品者。提婆達多。此云天熱。生時人天生熱。
因此立名。逆行。行本是佛師。衆生煩惱燒熱。故菩
薩示同病行而度脫之。文中先明昔日達多通經釋
迦成道。次明文殊今日通經。龍女成佛。第十三持品
者。有受持。有勸持也。第十四安樂行品者。身無危險
故安。心無憂惱故樂。身安心樂故能進行。此依事釋

也。著如來衣。則法身安。入如來室。故解脫心樂。坐如
來座。故般若導行進。此附上品文釋也。任忍辱地。故
身安。而不卒暴。故心樂。觀諸法實相。故行進。此附本
品文釋也。安名不動。六道生死。二聖涅槃。所不能動。
樂名無受。不受三昧廣大之用。不受凡夫之五受。乃
至圓教中五受。生見亦皆不受。有受則有苦。無受則
無苦。無苦無樂。乃名大樂。行名無行。不行凡夫行。不
行賢聖行。故言無行。而行中道。是故名行。此法門釋
也。文中凡有四段。卽是以止觀慈悲導三業及誓願

也。身業有止。故離身麤業。有觀。故不得身。不得身業。不得能離。無所得。故不墮。凡夫有慈悲。故勤修身業。廣利一切。不墮二乘地。有止。行故著忍辱衣。有觀。行故坐如來座。有慈悲。故入如來室。止行離過。卽成斷德。觀行無著。卽成智德。慈悲利他。卽成恩德。恩德資成智德。智德能通達斷德。是名身業安樂行。餘口意誓願亦如是。齊此是迹門流通竟也。第十五從地涌出品者。下方空中。法身大士。是釋尊本時弟子。今奉命湧出。弘經彌勒。尚自不識。由此發起開近顯遠之

大教也。第十六如來壽量品。正開近迹而顯遠本。如來者。十方三世諸佛。二佛三佛。本佛迹佛之通號也。壽者受也。量者詮量也。今正詮本地報身功德。而報身智慧。上冥下契。二身宛足。故言如來壽量品。第十七分別功德品者。佛說壽量。三世弟子得種種益。故言功德。淺深不同。故言分別也。品中有授記。領解流通。佛說長行爲總。授法身記。彌勒說偈爲總。申領解。此後爲流通分。於中先明現在四信。次明滅後五品。四信者。一。一念信。解未能演說。二。略解。言趣。三。廣爲

他説。四深信觀成五品者。一直起隨喜心。二加自受持讀誦。三加勸他受持讀誦。四加兼行六度。五加正行六度也。第十八隨喜功德品。明初品因功德以勸流通。隨者隨順事理無二無別。喜是慶已慶人。順理者聞佛本地深遠。深遠信順不逆。無一毫疑滯。順事者聞佛三世益物。橫豎該亘。徧一切處。亦無一毫疑滯。順理有實功德。順事有權功德。慶已有智慧。慶人有慈悲。權實智斷合而説之。故言隨喜功德品。第十九法師功德品。明初品果功德以勸流通。所謂六根

清淨。第二十常不輕菩薩品。引信毀罪。福證勸流通。內懷不輕之解。外敬不輕之境。身立不輕之行。口宣不輕之教。人作不輕之目。故名常不輕也。已上三品半文。卽勸持流通竟。此下有八品文。明付囑流通。又分爲三。神力囑累兩品。正明囑累流通。藥王下五品約化他勸流通。普賢一品約自行勸流通也。第二十一如來神力品者。神名不測。力名幹用。不測則天然之體。淺幹用則轉變之力大。此中爲付囑深法。現十種大力。故名爲神力品。第二十二囑累品者。囑是佛

所付囑。累是煩爾宣傳。此從聖旨得名。又囑是頂受。所囑。累是甘而弗勞。此從菩薩敬順得名。又囑是如來金口所囑。累是菩薩丹心頂荷。此從授受合論。是故如來躬從座起。申手摩頂。授以難得之法。大衆曲躬合掌。如世尊勅當具奉行。殷勤授受。故名囑累。第二十三藥王菩薩本事品者。勗弘法之師。應當竭其神力。盡其形命。以弘大法也。第二十四妙音品第二十五觀世音普門品。皆勸受法弟子。令知他方大士奉命弘經。普現色身。形無定準。不可以牛羊眼看。不

可以凡庸識度。於所聞處。勿生輕想。輕想則法不染心也。第二十六陀羅尼品者。惡世弘經。每多惱難。故以呪護之。使道流通。第二十七妙莊嚴王本事品者。說四聖之前緣。顯人護之功德。第二十八普賢菩薩勸發品者。梵音娑輪。廕陀。此翻普賢。亦翻徧吉。伏道周徧名普。鄰終際極名賢。勸發者。戀法之辭也。遙在彼國。具聞此經。始末既周。欲令自行化他。永永無已。故自東而來勸發。又總約十一品半流通之文。生起次第者。現在聞經得真。似兩益。如上說。若直聞一句

而生隨喜如現在四信格其功德。未來無佛恐人疑
福少。故說滅後五品功德也。因功德微密。未若果功
德彰灼。故說法師功德品。因果雙舉。未若引證分明。
故說不輕。雖舉往人。未若現變。故說神力。雖示神力。
未若摩頂付囑。故說囑累。雖通途囑累。未若示其要
術。棄身存道。故說藥王。雖誠能化。未若誠其所化。隨
聞法處。應生佛想。故說妙音觀音。若初心弘經。既無
神力。當依內禁。故說陀羅尼。復須外護。故說嚴王。普
賢。聯翩重疊。使大法弘通耳。復次普賢更請正說勸

發自行。更請流通勸發化他。佛總以四法答之。一者
爲諸佛護念。二者植衆德本。三者入正定聚。四者發
救一切衆生之心。卽是雙答正及流通大旨。何者。佛
雖無偏。若能遠惡從善。反迷還正。開權知見。顯佛知
見。則稱可聖心。諸佛護念。若佛知見。開則般若。照明
是植衆德本。亦是入正定聚。不亂不昧。不取不捨。亦
是發救衆生心。當知此四。與開權顯實。名異體同。無
二無別。又佛護念者。是開佛知見。植衆德本者。是示
佛知見。發救衆生心。是悟佛知見。入正定聚。是入佛

知見迹門之要此四收矣。又迹則有本。從本開示悟入。故有迹中開示悟入。今開迹卽顯本。本迹無二無別。以四法答其請。正於義明矣。以四法答請流通者。流通之方唯三唯四。發救衆生心是入如來室。入正定聚。佛所護念是著如來衣。植衆德本。是坐如來座。是弘宣之要。卽四而三也。又發救衆生心是誓願安樂行。入正定聚是意安樂行。植衆德本是口安樂行。諸佛護念是身安樂行。當知後四卽前四也。一答酬其兩請。舉四冠罩一經。法華之重演。豈不巧且妙哉。

所願一句沾神。咸資彼岸。思惟修習。永用舟航。隨喜見聞。恒爲主伴。若取若捨。經耳成緣。或順或逆。終因斯脫。願解脫之日。依報正報。常宣妙經。一刹一塵。無非利物。惟願諸佛。冥熏加被。一切菩薩。密借威靈。在未說皆爲勸請。凡有說處。親承供養。一句一偈。增進菩提。一色一香。永無退轉。

妙法蓮華經論貫

後序

昔李青蓮登黃鶴樓。見崔灑題詩。遂爲閣筆。知其

不可勝也。智者大師親證法華三昧。光宅尚破餘
家可知。後人紛紛再出手眼。未具青蓮學識。故耳
余既述佛頂玄文。諸友咸請再解法華。堅以此意
辭之。適因演妙典於紫雲。有達際法友。督梓梵文。
欲撮略全經大旨。以便初學。敬依玄義文句。節取
大綱。名爲綸貫。庶幾染指而知全鼎之味云爾。若
以抄錄舊文爲請。予何敢辭。萬益智旭謹識。

嘉興吳智印遺貲刻此綸貫。懺除畢姻時殺業。
願與亡伯亡妻及所傷生命同生淨土。同證菩提。

教觀綱宗

原名一代時教權實綱要圖。長幅難看。
今添四教各十乘觀。改作書冊題名。


北天日滿益沙門智旭重述

佛祖之要教觀而已矣。觀非教不正。教非觀不傳。有
教無觀則罔。有觀無教則殆。然統論時教大綱。有八
依教設觀。數亦略同。八教者。一頓。二漸。三秘密。四不
定。名爲化儀。四教如世藥方。五三藏六通七別。八圓
名爲化法。四教如世藥味。當知頓等所用。總不出藏
等四味。藏以析空爲觀。通以體空爲觀。別以次第爲
觀。圓以一心爲觀。四觀各用十法成乘。能運行人至

涅槃地。藏通二種教觀。運至真諦涅槃。別圓二種教觀。運至中諦大般涅槃。藏通別三。皆名爲權。唯圓教觀。乃名真實。就圓觀中。復有三類。一頓。二漸。三不定也。爲實施權。則權合于實。開權顯實。則實融于權。良由衆生根性不一。致使如來巧說不同。且約一代。略判五時。一華嚴時。正說圓教。兼說別教。約化儀名頓。二阿含時。但說三藏教。約化儀名漸初。三方等時。對三藏教。半字生滅門。說通別圓教。滿字不生不滅門。約化儀名漸中。四般若時。帶通別二權理。正說圓教。

實理。約化儀名漸後。五法華涅槃時。法華開三藏通別之權。唯顯圓教之實。漢明如來設教之始終。具發如來本迹之廣遠。約化儀名會漸歸頓。亦名非頓非漸。涅槃重爲未入實者。廣談常任。又末世根鈍。重扶三權。是以追說四教。追泯四教。約化儀亦名非頓非漸。而秘密不定。二種化儀。徧於前之四時。唯法華是顯露。故非秘密。是決定。故非不定。然此五時。有別有通。故須以別定通攝。通入別。方使教觀咸悉不濫。今先示五時八教圖。次申通別五時論。

80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9



通別五時論 最宜先知

法華玄義云。夫五味半滿論。別別有齊限。論通通於初後。章安尊者云。人言第二時十二年中說三乘別教。若爾。過十二年。有宜開四諦十二因緣六度。豈可不說。若說則三乘不止在十二年中。若不說則一段在後。宜聞者。佛豈可不化也。定無此理。經言為聲聞說四諦。乃至說六度。不止十二年。蓋一代中。隨宜聞者。卽說耳。如四阿含五部律。是為聲聞說。乃訖於聖滅。卽是其事。何得言小乘悉十二年中也。人言第

三時三十年中說空宗般若維摩思益依何經未知
三十年也大智度論云須菩提於法華中聞說舉手
低頭皆得作佛是以今問退義若爾大品與法華前
後何定也

論曰智者章安明文若此今人絕不寓目尚自訛傳
阿含十二方等八之妄說爲害甚大故先申通論次
申別論先明通五時者自有一類大機卽於此土
見華藏界舍那身土常住不滅則華嚴通後際也只
今華嚴入法界品亦斷不在三七日中復有一類

小機始從鹿苑終至鶴林唯聞阿含毘尼對法則三
藏通於前後明矣章安如此破斥癡人何尚執迷

復有一類小機宜聞彈斥褒歎而生恥慕佛卽爲說
方等法門豈得局在十二年後僅八年中且如方等
陀羅尼經說在法華經後則方等亦通前後明矣

復有三乘須歷色心等世出世法一會歸摩訶衍
道佛卽爲說般若故云從初得道乃至泥洹於其中
間常說般若則般若亦通前後明矣復有根熟衆
生佛卽爲其開權顯實開迹顯本決無留待四十年

後之理但佛以神力令根未熟者不聞故智者大師云法華約顯露邊不見在前秘密邊論理無障礙且如經云我昔從佛聞如是法見諸菩薩授記作佛如是法者豈非妙法又梵網經云吾今來此世界八千返坐金剛華光王座等豈非亦是開迹顯本耶復有衆生應見涅槃而得度者佛卽示入涅槃故曰八相之中各具八相不可思議且大般涅槃經追敘阿闍世王懺悔等緣並非一日一夜中事也

次明別五時者乃約一類最鈍聲聞具經五番陶鑄

方得入實所謂初於華嚴不見不聞全生如乳

準嚴前八

會中永無聲聞故云不見不聞至第九會入法界品在祇園中方有聲聞爾時已證聖果尚於菩薩境界如啞如聾驗知爾前縱聞華嚴亦決無益然舍利弗等由聞藏教方證聖果方預入法界會則知入法界品斷不說在阿舍前矣人胡略不思察妄謂華嚴局在三七日內耶次於阿舍聞因緣生滅法轉凡成聖如轉乳成酪

酪卽熟乳漿也

次聞方等彈

偏斥小歎大褒圓遂乃恥小慕大自悲敗種雖復具聞四教然但密得通益如轉酪成生酥次聞般若會一切法皆摩訶衍轉教菩薩領知一切佛法寶藏雖帶通別正明圓教然但密得別益如轉生酥成熟酥

次聞法華開權顯實方得圓教實益。如轉熟酥而成醍醐。然只此別五時法亦不拘定年月日時。但隨所應聞卽便得聞。如來說法神力自在。一音異解豈容思議。又有根稍利者不必具歷五味。或但經四番三番二番陶鑄便得入實。若於阿含方等般若隨一悟入者卽是秘密不定二種化儀所攝。復有衆生未堪聞法華者。或自甘退席或移置他方。此則更待涅槃拈捨或待滅後餘佛事非一概熟玩法華玄義文句羣疑自釋。

化儀四教說

頓有二義。一頓教部謂初成道爲大根人之所頓說。唯局華嚴。凡一代中直說界外大法不與三乘共者如梵網圓覺等經並宜收入此部是謂以別定通攝通入別也。二頓教相謂初發心時便成正覺及性修不二。生佛體同等義則方等般若諸經悉皆有之。

漸亦二義。一漸教部謂惟局阿含爲漸初。凡一代中所說生滅四諦十二緣生事六度等。方等爲漸中。凡一代中所說大乘權法並宜收入此部。說彈偏斥小。歎大褒圓等經及餘四時所不攝者。並宜攝入此部。如增上緣名義寬故。般若爲漸後。凡一代中所說若共不共諸般若教並宜攝入此部。二漸教相謂歷劫修行斷惑。

證位次第則率嚴亦復有之 法華會漸歸頓不同
率嚴初說故非頓不同阿含方等般若隔歷未融故
非漸然仍雙照頓漸兩相

秘密亦有二義一秘密教謂於前四時中或為彼人
說頓為此人說漸等彼此互不相知各自得益法華
正道故非秘密二秘密呪謂一切陀羅尼章句即五
時教中皆悉有之

不定亦有二義一不定教謂於前四時中或為彼人
說頓為此人說漸彼此互知各別得益即是宜聞頓

者聞頓宜聞漸者聞漸也法華決定說大乘
故非不定教相二不定

益謂前四時中或聞頓教得漸益或聞漸教得頓益
即是以頓助漸以漸助頓也隨聞法華一句一偈皆
得受記作佛故非不定

也益 頓教部止用圓別二種化法漸教部具用四種

化法顯露不定既徧四時亦還用四種化法秘密不
定亦徧四時亦還用四種化法 頓教相局惟在圓

通則前之三教亦自各有頓義如善來得阿羅漢等
漸教相局在藏通別三通則圓教亦有漸義如觀行

相似分證究竟等秘密教互不相知故無可傳秘密

咒約四悉檀故有可傳。不定教不定益並入前四時中。故無別部可指。約化儀教。復立三觀。謂頓觀。漸觀。不定觀。蓋秘密教。既不可傳。故不可約之立觀。設欲立觀。亦止是頓漸不定三法。皆秘密耳。今此三觀名與教同。旨乃大異。何以言之。頓教指華嚴經義。則兼別。頓觀唯約圓人。初心便觀諸法實相。如摩訶止觀所明是也。漸教指阿含方等般若。兼四教。復未開顯。漸觀亦唯約圓人。解雖已圓。行須次第。如釋禪波羅蜜法門所明是也。不定教指前四時亦兼四教。

仍未會合。不定觀亦唯約圓人。解已先圓。隨於何行或超或次。皆得悟入。如六妙門所明是也。此本在高麗國神州

傳失問。但說圓頓止觀。卽足。何意復說漸及不定。答。根性各別。若但說頓。收機不盡。問。既稱漸及不定。何故惟約圓人。答。圓人受法。無法不圓。又未開圓解。不應輒論修證。縱令修證。未免日劫相倍。

化法四教說

法尚無一。云何有四。乃如來利他妙智。因眾生病而設藥也。見思病重爲說三藏教。見思病輕爲說通教。

無明病重爲說別教。無明病輕爲說圓教。

○三藏教。四阿含爲經藏。毘尼爲律藏。阿毘曇爲論

藏。此教詮生滅四諦。苦則生異滅三相遷移。集則

對治易奪滅。貪瞋癡等分四心流動。道則

則滅有還無。亦詮思議生滅十二因緣。無明緣行

緣名色。名色緣六入。六入緣觸。觸緣受。受緣愛。愛

緣取。取緣有。有緣生。生緣老死憂悲苦惱。無明滅

則行滅。行滅則識滅。識滅則名色滅。名色滅則六

入滅。六入滅則觸滅。觸滅則受滅。受滅則愛滅。愛

滅則取滅。取滅則老死憂悲苦惱滅。亦詮事六度行。施

持戒忍辱精進禪定智慧。亦詮實有二諦。陰入界等實法爲

示界內鈍根衆生。令修析空觀。觀於地水火風空

識六界。無我我所

得約當教自論六卽

理卽者偏真也。諸行無常是生滅法。生滅滅已寂滅

爲樂。因滅會真滅非真諦。滅尚非真况苦集道真

諦在因果事相之外。故依行教判曰偏真

名字卽者學名字也。知一切法從因緣生。不從時方

梵天極微四大等生。亦非無因緣自然而生。知因

緣所生法皆悉無常無我

觀行卽者一五停心。二別相念。三總相念。外凡資糧

位也。五停心者。一多貪衆生不淨觀。二多瞋衆生
慈悲觀。三多散衆生數息觀。四愚癡衆生因緣觀。
五多障衆生念佛觀。以此五法爲方便調停其心。
令堪修念處。故名停心也。別相念者。一觀身不淨。
二觀受是苦。三觀心無常。四觀法無我。對治依於
五蘊所起四倒也。總相念者。觀身不淨。受心法亦
皆不淨。觀受是苦。心法身亦皆苦。觀心無常。法身
受亦皆無常。觀法無我。身受心亦皆無我也。

相似卽者。內凡加行位也。一煖。二頂。三忍。四世第一。

一得色界有漏善根能入見道。

分證卽者。前三果有學位也。初須陀洹果。此云預流。
用八忍八智頓斷三界見惑。初預聖流名見道位。
二斯陀含果。此云一來。斷欲界六品思惑。餘三品
在猶潤一生。三阿那含果。此云不還。斷欲界思惑。
盡進斷上八地思。不復還來欲界。此二名修道位。
究竟卽者。三乘無學位也。一小乘第四阿羅漢果。此
合三義。一殺賊。二應供。三無生。斷三界見思俱盡。
子縛已斷。果縛尚存。名有餘涅槃。若灰身泥智。名

無餘涅槃。二中乘辟支佛果。此人根性稍利。逆順觀察十二因緣。斷見思惑。與羅漢同。更侵習氣。故居聲聞上。三大乘佛果。此人根性大利。從初發心緣四諦境。發四弘誓。即名菩薩。修行六度。初阿僧祇劫。事行雖強。理觀尚弱。准望聲聞。在外凡位。第二阿僧祇劫。諦解漸明。在煖位。第三阿僧祇劫。諦解轉明。在頂位。六度既滿。更住百劫。修相好。因在下忍位。次入補處。生兜率天。乃至入胎。出胎出家。降魔安坐。不動時。是中忍位。次一剎那。入上忍。次

一剎那。入世第一。發真無漏。三十四心頓斷。見思正習無餘。坐木菩提樹下。以生草為座。成劣應身。
如釋迦丈六。彌勒十六丈等。受梵王請。三轉法輪。度三根性。緣盡入滅。與阿羅漢辟支佛。究竟同證。偏真法性。無復身智。依正可得。

此教具三乘法。聲聞觀四諦。以苦諦為初門。最利者三生。最鈍者六十劫。得證四果。辟支觀十二因緣。以集諦為初門。最利者四生。最鈍者百劫。不立分果。出有佛世名緣覺。出無佛世名獨覺。菩薩弘

誓六度以道諦爲初門。伏惑利生。必經三大阿僧祇劫。頓悟成佛。然此三人修行證果。雖則不同。而同斷見思。同出三界。同證偏真。只行三百由旬。入化城耳。十法成乘者。一觀正。因緣境破。邪因緣無。因緣二種顛倒。二真正發心。不要名利。惟求涅槃。二乘志出苦輪。菩薩兼憫一切。三遵修止觀。謂五停名。止四念名。觀四徧破見愛煩惱。五識道滅還滅。六度是通苦集流轉。六蔽是塞。六調適。三十七品入三脫門。七若根鈍不入。應修對治事禪等。入正助合行。或有

薄益。須識次位。凡聖不濫。九安忍。內外諸障。十不於似道而生法愛。是爲要意。利人節節得入。鈍者具十法方悟。

○通教。鈍根通前藏教。利根通後別圓。故名爲通。又

從當教得名。謂三人同以無言說道體。法入空。故

名爲通。此無別部。但方等般若中有明三乘共行。

者。卽屬此教。詮無生四諦。苦無逼迫相。集無和合相。道不二相。滅無生相。

亦詮思議不生滅。十二因緣。疑如虛空。乃至老死。如虛空。無明如幻化。

不可得故。乃至老死。如幻化。不可得。亦詮理六度行。一一三輪體空。亦詮幻

有幻空二諦。幻有為俗。幻有即空為真。亦詮兩種合中二諦。幻有者

為俗。幻有即空不空共為真。是通合別三諦故受別接。二者幻有為俗。幻有即空不空一切法趣空不空為真是通合。亦詮別入通三諦。有漏是俗。無漏非無。故受圓接。

亦詮別入通三諦。有漏是俗。無漏非無。故受圓接。二諦同前。點非漏非無。漏是中。亦詮圓入通三諦。漏具一切法與前中異。開示界內利根衆生。令修體空觀。陰界入皆如幻。化當體不可得。

出分段生死。證真諦涅槃。正化菩薩。傍化二乘。亦於當教自論六即

理即者。無生也。諸法不自生。亦不從他生。不共不無

因。是故知無生。此四句推檢。通別圓三教皆用作下手工夫。但先解不但中者即成。

圓教初門。先聞但中理者。即成別教。初門未聞中道體者。止成通教法門。解苦無苦而有真諦。苦尚即真。况集滅道。

名字即者。幻化也。知一切法當體全空。非滅故空。生死涅槃同於夢境。

觀行即者。一乾慧地也。未有理水。故得此名。即三乘外。凡位與藏教五停別相。總相念齊。

相似即者。二性地也。相似得法性理水。伏見思惑。即三乘內。凡位與藏教四加行齊。藏通指真諦為法性。與別圓不同。

分證即者。從八人地。至菩薩地。有七位也。三入地。

文見綱宗

十三

者。八無間三昧。八忍具足。智少一分。四見地者。八智具足。頓斷三界。見惑發真。無漏見真諦理。卽三乘見道位。與藏須陀洹齊。五薄地者。三乘斷欲界六品思惑。煩惱漸薄。與藏斯陀含齊。六離欲地者。三乘斷欲界思惑盡。與藏阿那含齊。七已辦地者。三乘斷三界。正使盡。如燒木成炭。與藏阿羅漢齊。聲聞乘人止此。八支佛地者。中乘根利。兼侵習氣。如燒木成灰。與藏辟支佛齊。九菩薩地者。大乘根性最勝。最利。斷盡。正使。與二乘同。不住涅槃。扶習。

潤生。道觀雙流。遊戲神通。成熟衆生。淨佛國土。此與藏教菩薩不同。藏教爲化二乘。假說菩薩伏惑不斷。正被此教所破。豈有毒器堪貯醍醐。

究竟卽者第十佛地也。機緣若熟。以一念相應慧斷。

餘殘習。坐七寶菩提樹下。以天衣爲座。現帶劣勝。

應身。分段生身故劣。如須彌山故勝。爲三乘根性。轉無生。照諦法。

輪。緣盡入滅。正習俱除。如劫火所燒炭灰。俱盡。與

藏教佛果齊。

此教亦具三乘根性。同以滅諦爲初門。然鈍根二

乘但見於空不見不空仍與三藏同歸灰斷故名
通前利根三乘不但見空兼見不空不空卽是中
道前被別圓來接故名通後中道又分爲二一者
但中唯有理性不具諸法見但中者接入別教二
者圓中此理圓妙其一切法見圓中者接入圓教
就此被接又約三位一者上根八人見地被接二
者中根薄地離欲地被接三者下根已辦地支佛
地被接就此三位被接又各有按位勝進二義若
按位接或同別十向或同圓十信若勝進接或登

別初地或登圓初任旣被接已實是別圓二教菩
薩於當教中仍存第九菩薩地名至機緣熟不現
成佛乃是別地圓任來示世間最高大身非由通
教教道得成佛也通教尚無實成佛義况藏教哉
藏教佛果亦皆別地圓任所現劣應身耳十法成
乘者一明觀境六道陰入能觀所觀皆如幻化二
明發心二乘緣真自行菩薩體幻兼人與樂拔苦
譬於鏡像三安心如空之止觀四以幻化慧破幻
化見思五雖知苦集流轉六蔽等皆如幻化亦以

幻化道滅還滅六度等通之六以不可得心修三十七道品七體三藏法無常苦空如幻而泯八識乾慧等如幻次位而不謬濫九安忍乾慧位內外諸障而入性地十不著性地相似法愛而入八人見地證真利鈍分別如前說

○別教謂教理智斷行位因果別前藏通二教別後

圓教故名別也

教則獨被菩薩理則隔歷三諦智則三智次第斷則三惑前後行則

五行差別位則位不相收因則一因迺

出。不即二邊果則一果不融諸位差別。此教詮無

量四諦

善有無量相。十法界不同故。集有無量相。五任煩惱不同故。道有無量相。恒沙佛法

不同故滅有無量相。亦詮不思議生滅十二因緣

諸波羅蜜不同故。

枝末無明為分段生因。根本無明為變易生因。亦詮不思議六度十度。

於一般若中復開方便願力智四種權智共成十度。一一度中攝一切法。生一切法。成一切法。法若恒沙。

亦詮顯中二諦。幻有幻有即空皆名。為俗。不有即空皆名。為真。亦詮圓入

別二諦。幻有幻有即空皆名。為俗。不有即空皆名。為真。亦詮別三

諦。開俗為兩諦對真。為中。中理而已。亦詮圓入別三諦。二諦同前。點真中道。

具足。開示界外鈍根菩薩。令修次第三觀。先空。次假。後中。

出分段變易二種生死。證中道無任涅槃。亦於當

教自論六即

理卽者但中也。真如法性隨緣不變。在生死而不染。證涅槃而非淨。迴超二邊不卽諸法。故依圓教判曰但中。

名字卽者解義也。仰信真如法性凡不能滅聖不能增。但由客塵覆蔽而不證得。須先藉緣修助發真修。方可尅證。

觀行卽者外凡十信位也。一信心。二念心。三精進心。四慧心。五定心。六不退心。七迴向心。八護法心。九戒心。十願心。旣先仰信中道且用生滅因緣觀伏

三界見思煩惱。故名伏忍。與通乾慧性地齊。

相似卽者內凡三十心三賢位也。初十住者。一發心住。斷三界見惑與通見地齊。二治地住。三修行住。

四生貴住。五方便具足住。六正心住。七不退住。斷三界思惑盡與通已辦地齊。八童真住。九法王子住。十灌頂住。斷界內塵沙與通佛地齊。此十住名

習種性。研習空觀用從假入空觀。見真諦。開慧眼。成一切智。行三百由旬。證位不退。次十行者。一歡喜行。

二饒益行。三無瞋恨行。四無盡行。五離癡亂行。六

善現行。七無著行。八尊重行。九善法行。十眞實行。
 此十行名性種性。分別假性用從空入假觀。徧學四教。
 四門斷界外塵沙。見俗諦。開法眼。成道種智。次十
 迴向者。一救護衆生。離衆生相迴向。二不壞迴向。
 三等一切佛迴向。四至一切處迴向。五無盡功德
 藏迴向。六隨順平等善根迴向。七隨順等觀一切
 衆生迴向。八眞如相迴向。九無縛解脫迴向。十法
 界無量迴向。此十向名道種性。中道能通習中觀伏無
 明行。四百由旬。居方便有餘土。證行不退。

分證卽佛者。十地聖種性。證入聖地及等覺性。去佛一等也。初

歡喜地名見道位。以中道觀。見第一義諦。開佛眼。
 成一切種智。行五百由旬。初入實報無障礙土。初
 到寶所。證念不退。得無功用道。隨可化機緣。能百
 界作佛。八相成道。利益衆生。二離垢地。三發光地。
 四燄慧地。五難勝地。六現前地。七遠行地。八不動
 地。九善慧地。十法雲地。各斷一品無明。證一分中
 道。更破一品無明。入等覺位。亦名金剛心。亦名一
 生補處。亦名有上士。

究竟卽佛者妙覺性也。妙極從金剛後心更破一品

無明入妙覺位。坐蓮華藏世界七寶菩提樹下大

寶華王座現圓滿報身。量同塵刹。相好刹塵。爲鈍根菩薩轉

無量四諦法輪

此教名爲獨菩薩法。以界外道諦爲初門。藏通道諦卽界

外集藏通滅諦卽界外苦故以界外道諦治之。無復二乘而能接通。通教

三乘旣被接後皆名菩薩不復名二乘也。十法成

乘者。一緣於登地。中道之境而爲所觀。迺出空有

之表。二真正發心普爲法界。三安心止觀定愛慧

策四次第徧破三惑。五識次第三觀爲通見思塵

沙無明爲塞。傳傳檢校是塞令通。六調適三十七

道品。是菩薩寶炬陀羅尼。入三解脱門。證中無漏

七用前藏通法門助開實相。八善知信任行向地

等妙七位差別終不謂我叨極上聖。九離違順強

軟二賊策十信位入於十住。十離相似法愛策三

十心令入十地。

○圓教謂圓妙。三諦圓融。三一相卽。圓足。圓見

一念圓頓。體非漸成。故名圓教。所謂圓伏。圓伏。事理圓信。圓常

正信圓斷。一切斷。圓行。一行。圓位。一位。圓自在。

莊嚴。一心三諦為所莊嚴。圓建立眾生。四悉。此教

詮無作四諦。善提無集可斷邊邪皆中正無道可

修生死即涅槃。無明亦詮不思議不生滅十二因緣。受取

煩惱即菩提。善提通達無復煩惱即究竟淨了因

名色六入觸受生老死苦即法身法身無苦無樂

二因緣名亦詮稱性六度十度。施為法界一切法

亦詮不思議二諦。幻有幻有即空皆為俗一切法

俗即珠是用即珠是真如意珠以警真用以警真亦

詮圓妙三諦。非惟中道具足佛法真俗亦然開示

界外利根菩薩令修一心三觀。顯性成修稱性圓

不一時圓超二種生死圓證三德涅槃正約此教

方論六即。前三雖約當教各論六即成未究竟以

覺僅同此教分證即佛又就彼當教但有六義未

而言之藏通極果別十廻向皆名理即。

理即佛者不思議理性也如來之藏不變隨緣隨緣

不變隨拈一法無非法界心佛眾生三無差別在

凡不滅在聖不增

名字卽佛者聞解也。了知一色一香無非中道。理具事造兩重三千。同在一念。如一念一切諸念亦復如是。如心法一切佛法及衆生法亦復如是。

觀行卽佛者五品外凡位也。一隨喜。二讀誦。三講說。四兼行六度。五正行六度。圓伏五任煩惱。與別十信齊。而復大勝。

相似卽佛者十信內凡位也。名與別十信同而義大異。初信任運先斷見惑證位不退。與別初任通見地藏初果齊。二心至七心。任運斷思惑盡與別七任通已辦藏。

四果齊而復大勝。故永嘉云。同除四任。此處爲齊。若伏無明。三藏則劣也。八心至十心。任運斷界內外塵沙。行四百由旬。證行不退。與別十向齊。

分證卽佛者十任十行十向十地等覺聖位也。名亦同別

而義大異。初任斷一分無明證一分三德。正因理心發各法身德了。因善心發各解脫德。一心三觀任運現前。具佛五眼。成一心三智。行五百由旬。初到寶所。初居實

報淨土。亦復分證常寂光淨土。證念不退。無功用道。現身百界。八相作佛。與別初地齊。二任至十任

與別十地齊。初行與別等覺齊。二行與別妙覺齊。三行已去。所有智斷別教之人不知名字。

究竟卽佛者。妙覺極果。斷四十二品微細無明。永盡

究竟登涅槃山頂。以虛空爲座。成清淨法身。

一好

等真居上上品常寂光淨土。亦名上上品實報無

障礙淨土。性修不二。理事平等。

此教名最上佛法。亦名無分別法。以界外滅諦爲初門。當體卽佛。而能接別接通。接別者。上根十任。被接。中根十行被接。下根十向被接。按位接卽成。

十信。勝進接。卽登初住。接通已。如通教中說。故曰。別教接賢不接聖。通教接聖不接賢。以別若登地。乃名爲聖。證道同圓。不復論接。通八人。上便名爲聖。方可受接。若乾慧性地。二賢僅可稱轉入別圓。未得名接。若藏教未入聖位。容有轉入通別圓義。已入聖後。保果不前。永無接義。直俟法華。方得會入圓耳。十法成乘者。一觀不思議境。其車二真正發菩提心。又於其上三善巧安心止觀。車內安四以圓三觀破三惑徧。其疾五善識通塞。車外枕六

調適無作道品七科三十七分。有大白牛肥壯多力等七以

藏通別等事相法門助開圓理。又多僕從而侍衛之八知次

位。令不生增上慢。尤能安忍策進五品而入十信。

十離法愛策於十信。令入十住乃至等妙。乘是寶乘遊於

四方至道場上根觀境。即於境中具足十法。中根從二

展。轉至六隨。一一中得具十法。下根須具用十也。

又復應知說前三教為防偏曲。文意所歸正歸於

此。

附轉接同會借說

轉○藏七賢得轉入通別圓○通乾慧性地得轉入

別圓○別十信得轉入圓○此三皆不名接。以僅

在初心。脚跟未牢。故但名轉。

接○通八人見地薄地離欲已辦支佛得接入別圓

○別住行向得接入圓○根有利鈍故接有遲速。

如以好桃李接彼平常桃李。故名為接。

同○別十地證道同圓。不復名接。但存教道之粗以

待法華開會成妙○別初住。通見地藏初果等。亦

得約所斷惑名同。

會○開藏七賢通乾慧性地別十信卽圓五品○開藏初果通見地別初任卽圓初信○開藏四果通已辨別七任卽圓七信○開別十向卽圓十信○開別十地卽圓十任

功在法萃

借○欲接通入別先借別明通如云歡喜地斷見惑遠行地斷思惑等○欲舍別於通必借通明別如云須陀含若智若斷是菩薩無生法忍等○欲接別入圓先借圓明別如云初任能現八相猶有微苦等○欲舍圓於別先借別明圓如云三賢十聖

任果報等

問曰但依圓教直指人心見性成佛豈不痛快直捷何用此葛藤爲答曰六祖大師不云乎法法皆通法法皆備而無一法可得名最上乘倘有一法未通卽被此法所縛倘有一法未備卽被此法所牽旣被縛被牽故於不可得之妙法誤認爲葛藤耳臨濟云識取綱宗本無實法汝乃欲捨葛藤而別求實法耶永明大師云得鳥者網之一目不可以一目而廢衆目收功者棋之一著不可以一著

而廢衆著法喻昭然胡弗思也問曰藏通同詮真諦何故藏以四果爲究竟通必佛地爲究竟耶答曰藏教正爲二乘通教正爲菩薩故也問曰一般斷見思惑何故藏通名聖別圓名賢答曰藏通詮真故見真卽得名聖別圓詮中故見中方得名聖見真僅可名賢也問曰藏四加行通性地旣稱相似何故僅齊別圓觀行答曰藏通聖位旣成別圓內凡則藏通內凡僅成別圓外凡復何疑哉

教觀綱宗

畢

嘉興吳智印遺貴刻

教觀綱宗釋義

北天目蕩益沙門智旭述

教者聖人被下之言也觀者稟教修行之法也教網萬殊大綱唯八而化儀無體全攬化法爲體則藏通別圓四教乃教之綱也依教設觀亦復萬殊而析空體空次第一心四觀收無不盡則析體等四乃觀之綱也教觀雖各有四而前三是權後一是實爲實施權開權顯實乃佛法之宗要也臨濟云識取綱宗本無實法夫四教四觀總爲對治衆生見思無明重輕

諸病而設。藥不執方。合宜而用。所以施此四教。須有頓漸秘密不定四種之殊。豈容執著。又爲實施權則不可執實而廢權。開權顯實則不可執權定異實。故云無實法也。

觀非教不正四句

問。教觀止約自行化他。本無二理。何得云有教無觀。有觀無教。耶。答。得意之人。舉一教字。教爲法界。便具觀法。不必更別言觀。舉一觀字。觀爲法界。便具教法。不必更別言教。只因衆生但認語言爲教。不能與觀

相應。但認工夫爲觀。不能與教相應。故設做工夫。不以教印。則盲修瞎鍊。未免行邪險徑。名之爲殆。猶所云思而不學也。設學文字。不解觀心。則說食數寶。究竟茫無受用。名之爲罔。猶所云學而不思也。

依教設觀數亦略同

化法四教。則有四觀。化儀四教。但有三觀。無秘密觀。故云略同。又頓漸不定三教。統該化法四教。而頓漸不定三觀。唯約圓觀。故云略同。明其不盡同也。

半字滿字

喻出大涅槃經。例如此方小學大學也。三藏正化二乘。傍化菩薩。哆哆和和。漸誘初學。故如半字。通教正化菩薩。傍化二乘。名爲大乘初門。別教獨菩薩法。圓教純明佛法。故如滿字。此略判也。細而論之。藏通詮真名爲半字。別圓詮中。名爲滿字。又藏教不能通至別圓。故但是半字。通教能通別圓。是半而含滿。別教須用藏通方便。是滿而帶半。唯圓教始終皆以佛知佛見而爲修行。是滿字法門也。

生滅門不生不滅門

三藏詮生滅四諦。由之證道。故名爲生滅門。通教詮無生四諦。由之證道。故名爲不生不滅門。亦一往略判也。細而論之。三藏是界內生滅門。通教是界內不生滅門。別教是界外生滅門。圓教是界外不生滅門。又通教約界內論。雖不生滅。約界外觀。仍屬生滅。以其但能體分段空。不能體變易空。故別教約界外論。雖云生滅。約界內觀。亦不生滅。以其雖不體變易空。亦能體分段空。故○言界內界外者。三界之內。見思爲因。所感分段生死。爲果。藏通二教。正治此病。名界

內教。三界之外。方便實報二土。無明爲因。所感變易
生死爲果。別圓二教。正治此病。名界外教。

對半明滿

諸方等經。彈偏斥小。歎大褒圓。故云對半明滿。然細
論之。或以別圓對破三藏。如維摩經五百弟子品
是也。或以別圓對破藏通。如佛與彌勒論說俗諦諸
大弟子。謂說真諦真俗俱不解是也。或唯以圓對破
藏通。別教如大佛頂首楞嚴經。訶斥不知常住真心
性淨明體。用諸妄想。不知二種根本。錯亂修習。別成

三乘魔外者是也。

涅槃追說四教追泯四教

重爲未入實者。廣談常住。是追說圓教也。又爲末世
鈍根。重扶三權。是追說藏通別教也。雖復四教並談
而與方等四教不同。方等中之四教。藏通初後並不
知常。別教初不知後。方知。初心雖知中道。是但中理。不具諸法。不同涅槃佛性。
唯圓教初後俱知。今涅槃中之四教。同知常住。故不
同也。既前三教亦皆知常。不同方等中隔異之三。是
追泯藏通別也。既扶三權以助一實。不同方等中對

孝觀釋義
三之一。是追泯圓教也

般若帶通別正明圓教

會通一切世出世法皆摩訶衍互具互融。是圓教也。或說法性離一切相非生死。非涅槃非有爲非無爲等。則是帶別教義。或說一切法如幻如夢。或說諸法實相。三乘同證。則是帶通教義。蓋般若明空有共不共。共卽諸法本空。三乘同證。出三界因果幻縛。是通教義。不共卽第一義空菩薩獨入。斷三土二死因果。是別圓義。若云依第一義空得成諸法。猶是別義。若

云卽第一義空頓具諸法。諸法無非第一義空。乃是圓義也。細玩大部般若顯發圓義爲多。爲鈍根人。略帶通別方便耳。後人判般若爲空宗者。但得共意。尚未知別教義。何況有圓教義耶。

秘密不定

具足應云秘密不定顯露不定。蓋一音說法隨類異聞異解。就相知邊則名顯露不定。就不相知邊則名秘密不定也。秘密故無可傳。可傳便屬顯露不定。又或一座說法兩人所聞所解不同。若互相知則皆名

顯露不定。若互不知。則皆名秘密不定。若此知彼彼不知。此或彼知此。此不知彼。則約不知邊便名秘密。若約知邊便名不定也。

法尚無一云何有四

諸法寂滅相不可以言宣。又諸法從本來常自寂滅相。寂滅則何一何四。此所謂識取綱宗本無實法也。因病設藥。大綱唯四開權顯實。究竟歸一。一爲實。三爲權。權實相對皆是不得已而有言。若論本體不但不可名四亦復不可名一。故云非權非實也。然所謂

非權非實者。非謂出權實外。別有一法名爲非權非實。但以權卽實家之權。故卽非權。實卽權家之實。故卽非實。猶云波卽水家之波。故卽非波。水卽波家之水。故卽非水。究竟同一濕性耳。濕性豈在波水外哉。

四阿含毘尼阿毘曇

阿含亦云阿笈多。亦云阿笈摩。此翻教。又翻法歸。又翻傳所說義。又翻無比法。通則大小二教皆名阿含。別則增一阿含約數明法。長阿含明世界生起等事。中阿含明諸深義雜阿含明諸禪法。乃摩訶迦葉請

阿難陀結集。故云四阿舍也。毘尼亦云毘柰耶。亦云鼻柰耶。此翻善治。亦翻調伏。亦翻滅。亦翻律。通則佛所說教皆名正法。毘尼別則因事所制五篇戒相。摩訶迦葉請優波離結集。成毘尼藏。初唯一部。後因諍故。分爲大衆上座兩部。乃至分爲十八部等。久後流傳止。留五部也。阿毘曇亦云阿毘達磨。此翻無比法。又翻對法。通則佛所說法亦皆名阿毘曇。別則摩訶迦葉自結佛所說論及阿羅漢所造諸論名爲阿毘曇也。問。半滿皆有三藏。何故獨名半字法門以爲三

藏教耶。答。凡有二義。一者半字三藏。部帙各別。滿字經律二藏混同。二者據法華云。食著小乘三藏學者。又智度論處處以摩訶衍斥三藏法。故呼半字法爲三藏教也。問。何故不名爲小乘教耶。答。此教具有三乘權法。是故不可偏名小乘。

生滅四諦

三界二十五有果報色心。並是三相有爲之法。故名生滅苦諦。貪分煩惱二萬一千。瞋分癡分等分亦各二萬一千。總此四分。共有八萬四千煩惱。此煩惱心

皆悉流動擾濁內心。由此方起善惡不動。三有漏業能感三界生死苦果。故名生滅集諦。以戒定慧對治。易奪貪瞋癡等。名爲出世之道。譬如明生暗滅。故名生滅道諦。滅彼三界因果之有。方得還于真諦之無。故名生滅滅諦也。問。有爲四相。所謂生住異滅。今胡但云。生異滅。復有處。但云。生住滅耶。答。略則但言生滅。足顯有爲。廣則須言生住異滅。以表無實。生表此法。先非有。滅表此法。後定無。異表此法。非凝然。住表此法。暫有用。今處中說。故云。三相自無。而有假說爲

生。自有而無。假說爲滅。中間暫有假說爲住。住不久。停。復名爲異。故言住卽攝異言。異卽攝住也。若二若三。若四。總顯有爲虛妄不實。平等平等。

思議生滅十二因緣

發業無明。大約有二。一者異熟果愚。不知善惡因果。確然無謬。故發三塗惡業。二者真實義愚。不知三界無常無我。貪著人天色無色界果報。故發有漏善業。及禪定業。由此二種無明。既發有漏善惡。不動三種行已。便于現前一念心中。引得將來三界受生識種。

卽此識種便具名色六入觸受等種故云無明緣行
乃至觸緣受也復由迷事無明于昔因所感現境界
受不了知故而起貪愛所謂于諸樂受則愛其合于
諸苦受則愛其離等復由此愛而起于取所謂于諸
樂受種種追求令其常合于諸苦受種種方便令其
速離等以此愛取二種潤生之惑數數溉灌心中識
等五支種子令其漸漸增長成熟便生有芽有芽旣
生則此身滅位任運向彼受生旣受生已任運遷變
而至老死起于種種憂悲苦惱故云受緣愛乃至生

緣老死等也所以無明及行爲能引二支識名色六
入觸受爲所引五支愛取及有爲能生三支生及老
死爲所生二支十支屬因皆約現世二支屬果別約
未來依生死果復起無明依于無明復起行等致使
三界因果不絕足顯輪迴及離斷常不墮無窮之過
此釋出在唯識的可依承不必更依小乘論解也問
十使皆能發業皆能潤生何故發業偏說無明潤生
偏說愛取耶答發業則無明力強舉強以該弱潤生
則愛取用勝舉勝以攝劣釋此十二緣生更有多門

分別。具如識論須往尋之

實有二諦

此教但明人空。不明法空。故云五陰十二入十八界皆是實法。依此實法和合。假名爲人。人雖定無法則實有。名爲俗諦。直待修人空。觀斷盡見思。方滅三界陰入界等俗法。復歸真空。名爲真諦也。

諸行無常四句

若論此四句。傷亦能橫豎該攝。一代時教。初橫攝者。藏教以三界依正色心因果。名爲諸行。一一皆是無

常生滅之法。必須滅此因果。方證真諦寂滅之樂。通教亦以三界依正色心因果。名爲諸行。皆是無常生滅之法。體此生滅。卽是滅已。便證真諦寂滅之樂。然此二教。雖證寂滅。實無能受樂者。以無復身智故。別教則以分段變易二種因果。通名諸行。皆非真常。皆是生滅門攝。滅此二邊。顯于中道寂滅之理。而有四智菩提妙心。有大圓鏡智相應心品。所現無漏身土妙色。故得恒受此真樂也。圓教亦以十界因果。通名諸行。通名無常。通名生滅。而了達因果。卽是實相。無

常卽常。生滅卽無生滅。故云生滅滅已寂滅爲樂。此則不斷癡愛起於明脫。如融冰爲水。所以三千果成。咸稱常樂也。次豎攝者。諸行無常句。攝得六凡法界。以有爲有漏故。是生滅法句。攝得藏通二乘法界。以出世聖人。乃能知其爲生滅故。生滅滅已句。攝得別教菩薩法界。以滅二邊歸中道故。寂滅爲樂句。攝得圓教佛法界。以諸法從本來常自寂滅相故。今但用此四句證偏真理。則諸行無常是生滅法。二句卽苦集二諦。生滅滅已一句約三學爲能滅。卽道諦。約

因果爲所滅。卽滅諦。四諦皆是因果事相。名安立諦。寂滅爲樂一句約所顯理。以爲真諦。乃是非安立諦。故云理居事外爲偏真也。

知一切法從因緣生

名字位中。觀察正因緣境。其破外道凡夫分別。我法二執。言法執者。不出邪因緣及無因緣二種。時方梵天等名邪因緣。自然名無因緣也。言我執者。妄計是常是一。自在能爲主也。然知一切法從因緣生。亦有四教差別。若知性具爲因。迷悟爲緣。三千性相爲所

生法。卽屬圓教。若謂一切種識爲因。展轉熏習爲緣。分段變易。乃至四智菩提爲所生法。卽屬別教。若以六識相應有漏種子爲因。六塵美惡中庸境界爲緣。三界依正色心因果爲所生法。卽屬藏通二教。但通教則知若因若緣。若所生法。皆如幻夢。藏教則以爲實法耳。故圓解則能徧破外道。凡夫我法二執及藏通別等種種法執。別教亦能破于外道。凡夫我法二執及藏通二教法執。通教亦能破于外道。凡夫我法二執及三藏教法執。今藏教則唯破外道。凡夫我法

二執也。旣從內六識因。外六塵緣而生。則三界依正決定不從時生。不從方生。不從大梵天生。不從極微性生。不從地生。不從水生。不從火生。不從風生。不從空生。亦不從神我生。亦不從本際生。但由內因外緣和合。所以虛妄有生。則亦非自然生。故能徧破邪因緣。無因緣二種法執也。若法從因緣生。生必有滅。故無常。生滅相異。故非一。非一則不自在。不能爲主。故必無我。正報旣非是我。則依報亦必非我所矣。

煖頂忍世第一

由四念處發四正勤。斷二惡修二善。勤觀四諦能發
似解。猶如鑽火。先得煖相。故名爲煖。由修四如意足。
發生禪定。諦觀轉明。如登山頂。洞覽四方。故名爲頂。
由定慧均平。善法增進。能成信等五根。安住不動。故
名爲忍。由五根增長。成力能破五障。而階見道。于諸
世間。有漏位中。最爲勝妙。故名爲世界第一。以此有漏
聞思修慧爲增上緣。資助本具無漏種子。令發現行
而入見道。

八忍八智

欲界四諦下。各有一忍一智。謂苦法忍苦法智等。色
無色界四諦下。亦各有一忍一智。謂苦類忍苦類智
等。合爲八忍八智。忍卽無漏禪定。智卽無漏觀慧也。
無間道中。三昧斷惑。名之爲忍。乃卽慧之定。解脫道
中。觀慧證理。名之爲智。乃卽定之慧。

真無漏三十四心

見道八忍八智。名十六心。修道約主界九地。各有一
無礙一解脫。名十八心。見修合論。共成三十四心。此
之定慧。並從無始本具無漏種子所發現行。由此現

行能證真諦我空真如故云發真無漏三十四心也
三大阿僧祇劫所修福智爲增上緣無始法爾無漏
種子爲親因緣故得頓發頓斷頓證然約所斷惑品
故分三十四心若約能斷能證唯是無漏定慧而已
所證祇是我空真如亦名擇滅無爲無爲真如不墮
諸數以無爲法而有差別故名三十四心復分漸頓
種種不同

苦無逼近相四句

三界色心依正諸果名爲苦諦如幻如夢當體全空
所以無逼近相所謂生死卽涅槃也見思煩惱有漏
行業名爲集諦不自他生不共無因所以無和合相
所謂煩惱卽菩提也旣體達煩惱卽是菩提故道不
二相非別有法爲能治也旣體達生死卽是涅槃故
滅無生相非別有法可證得也然此但是卽空故與
圓教卽中不同

癡如虛空乃至老死如虛空無明如幻化不可
得故乃至老死如幻化不可得

癡卽無明也十二因緣流轉還滅名相與前藏教不

殊。但以體空智慧了達生卽非生滅卽非滅耳。癡如虛空等者諦觀無明不在內不在外不在中間猶如虛空但有名字毫無實體也行等例知無明如幻化等者無明不自生不他生不共生不無因生以當體不可得故喻如幻化本不可得不可妄謂自他共離生也行等亦然

幻有空二諦

三界因果色心依正並是非有似有猶如幻事指此幻有以爲俗諦有旣是幻則當體全空非滅故空指

外 此卽空以爲真諦此則真俗不二不同藏教真居事

兩種含中二諦

通合別者幻有爲俗如前說幻有卽空爲真而此空理卽是真如其體不空故能爲迷悟依是則真諦之中含有別教中道理體故各通合別二諦也通合圓者幻有爲俗亦如前說幻有卽空爲真而此空理卽如來藏亦名爲空亦名不空各空之時空卽具一切法一切法皆趣此空言不空時不空亦卽具一切法

一切法皆趣不空。是則真諦之中。含有圓教。圓空圓中道理。故名通合圓二諦也。

別入通三諦

通教止云有漏是俗無漏是真。今立非漏非無漏句。以顯中道。則三諦義成。蓋由前通合別二諦。故成此別入通三諦也。

圓入通三諦

二諦同前。今立非漏非無漏句。以顯中道。一切法皆趣非漏無漏。則此非漏無漏。具一切法。圓中義成。蓋

由前通合圓二諦。故成此圓入通三諦也。

諸法不自生四句

四性推檢。通乎四教。無生之義。局在後三。藏通二教。指六凡爲諸法。別圓二教。指十界爲諸法。藏教明六凡諸法。自種有故。不從他待。衆緣故。非自作。無作用。故非共生。有功能。故非無因。

此四句
出集論

則顯緣起正理。

不墮四執也。通教明六凡諸法。如幻如夢。如水中月。如空中花。非有似有。卽非有。不可說從自。他共離而生。且如妄情所計。三界有爲生法。雖復萬品差殊。

略而言之心境二字收無不盡。先約心法以推四性。若自生者從心生。心應有二心。又不對境時。心應常生。而實不生。故非自生。若他生者。從境生心。于我何與。又聖者對境亦應生心。而聖不生。故非他生。若共生者。爲心境各有生性。故共生耶。爲心境各無生性。故共生耶。若心境各有生性。何須待共方生。又設待共方生。應有二心。並生謂一從心生。一從境生。故而實不然。若心境各無生性。共亦何能有生。如一砂無油。衆砂共壓。亦豈有油。故非共生。若云無因生者。既

不因心。又不因境。心境尚無。云何能生于心。不應虛空。突出心識。故非無因。如是四性檢責。不得心之生處。則知心本無生也。次約境法。以推四性。若自生者。從境生。境應有二境。又心不緣時。境應常現。而實不現。故非自生。若他生者。從心生。境還屬心。何得各境。又心念兔角。兔應生角。而角不生。故非他生。若共生者。例如前破。但以二心並生。改作二境並生。爲異。若云無因生者。不應目中忽覩明月。如是四性檢責。不得境之生處。則知境亦無生也。是以若心若境。俱

如幻夢。求其生性了不可得。當體無生。此無生理。今古常然。始終不改。佛不能增。生不能減。但約種性差別。有三乘人。約悟入淺深。分十地位耳。別教明十界諸法。自種有故。不從他待。衆緣故。非自作。無作用。故非共生。有功能。故非無因。則顯不思議緣起正理。皆以真如爲迷悟依藏。識爲持種依。以先知有真如藏識。而用四性推簡入無生門。故爲別教工夫也。圓教明十界諸法。非法性生。故非自生。非無明生。故非他生。非法性無明合生。故非共生。非離法性無明別有。

諸法。故非無因而生。隨一一法體卽法界。當體無生。無生而生。三千宛然。生卽無生。三千無性。非生非無生。唯一實相。實相非生。生亦實相。實相非無生。無生亦實相。法在法位。世間相常。因緣卽中。雙照空假。此是圓教初無生門。一門一切門。阿字卽具四十二字功德。餘字亦然。故爲圓妙無工夫之工夫。

解苦無苦而有真諦

三界果報名爲三苦。解之則皆如空華。無逼近相。但是真空法性而已。真諦卽在虛妄苦諦之上。如空處。

卽在華處無二處也。于此真諦假立四名。四並卽真真非事外。乃是通教所詮之理。今人談玄說妙。迴起情見。壁立萬仞。總皆不能出此。

扶習潤生

別圓二教證中道理。則以中道法身爲應化本。譬如月印萬川。不須惑業受生也。藏教說惑是實。有故菩薩不可斷惑。斷則不能三僧祇受生行道矣。通教說惑是幻。有故菩薩體幻而斷正使。正使旣斷。設欲涅槃。卽便能入。但由本願力故。不取涅槃。以神通力扶

起三界思惑餘習。資于故業種子而得受生。所謂思惑餘習者。非貪似貪。非慢似慢。非癡似癡等是也。

行則五行差別

戒定慧三名爲聖行。十住入空行也。慈悲喜捨名爲梵行。十行十向入假行也。依理成行名爲天行。初地已上中道行也。從天行體起化他用。示同小善名嬰兒行。卽慈用也。示同煩惱名爲病行。卽悲用也。藏通二教但有聖行及少分梵行耳。今有五行故不同。前圓教則一行一切行。今有次第故不同後。

一因迥出不卽二邊

正因佛性卽指中道理體非是生死亦非涅槃藏通二教之所不詮又復不具緣了二因故不同圓

一果不融諸位差別

妙覺極果方證法身不云初發心時便成正覺也

不思議生滅十二因緣

枝末無明爲分段生因已如藏教中釋根本無明者不了心外無法厭苦斷集證滅修道卽是迷于中道真實義諦發起界外偏真無漏行也由此引生方便

變易生死識種復緣界外無漏正受而起涅槃法愛深生取著潤彼變易識種令生有芽招感方便不思議變易生死又不了心外無法訶棄真空別修萬行亦是迷于中道真實義諦發起界外入假神通行也由此引生實報變易生死識種復緣界外勝妙境界而起神通法愛深生取著潤彼變易識種令生有芽招感實報不思議變易生死直至佛果則十二品無明盡滅方得二死永亡

顯中二諦

束通教之二諦以爲俗諦則十界皆爲俗也。以不有
不空爲真則中道爲十界迷悟所依乃爲真也。明言
中道爲真故稱顯中。

圓入別二諦

當教以真諦顯中。中但不有不空法性而已。今明法
性具一切法。一切法皆趣不有不空。則不有不空之
外更無一法可得。是十界之俗猶屬別義。不有不空
之真已成圓義也。

別三諦

顯中二諦則合有之與空爲俗。不有不空爲真。今分
此俗諦爲二。謂有卽是俗。空卽是真。取真諦之不有
不空名爲中諦。則二諦三諦。但有開合之殊。義無增
減。

圓入別三諦

有卽是俗。空卽是真。不改別義。不空不有。名爲中諦。
中諦具一切法。則爲圓中矣。

圓建立衆生

藏通別教。雖亦各論四悉檀。益而收機未普。今圓教

人窮心性源。徹法界底。自行既圓。故四益亦普。所謂
爲實施權。開權顯實。權實不二。用與適宜。如一雨所
潤。大地普洽也。

三千性相皆名爲俗。一一無非實相。故名爲真。三千
之外。無實相。則卽俗恒真。事造卽理具也。實相之外
無三千。則卽真恒俗。理具卽事造也。故云。理具事造
兩重三千。同居一念。亦可云同居一塵。同居一名。如
一念。一切諸念亦然。如一塵。一切諸塵亦然。如一名。

一切諸名亦然。真俗不二。真俗宛然。

圓證三德涅槃

法身德名性淨涅槃。般若德名圓淨涅槃。解脫德名
方便淨涅槃。唯是一心。更不縱橫並別。故名圓證。藏
通二教。不知法身。但有修得生空般若。僅能淨于見
思。未得一切解脫。別教謂法身本有般若。修成解脫
始滿。則先後歷別。不名圓證。

十乘觀法

第一觀不思議境界者。心佛衆生。三無差別。佛法衆生

法。一皆不思議。皆得爲所觀境。但初機之人。則謂佛法太高。生法太廣。故但就現在自己陰界入法。以爲所觀。又捨界入。但觀于陰。又捨前四陰。但識陰。又七八二識。微細難觀。前五根識現起時少。故但以現前一念第六意識爲所觀境。近而復要也。現前意識不起。則已起。則于十界中。必落一界。若落一界。必具百界千如。以此隨落一界之心。非是心之少分。必是心之全體。心外更無百界千如故也。若頓了此現前一念。全具百界千如。三千性相。無自性。無他性。無

共性。無無因性。無性亦無性。則能頓證三德秘藏。則爲初發心時。便成正覺。則是定慧平等莊嚴。則已徧破三惑。則已了知一切諸法中。皆有安樂性。則已具足圓妙道品。則已到于事理彼岸。則爲登于菩薩正位。則爲永超十魔八魔。則已心心流注。薩婆若海。是謂上上根人。祇于一法。具足十法乘也。若雖觀心未。能頓入。應念心。佛衆生。三無差別。云何諸佛已悟我。及衆生猶滯迷情。由是緣無作四諦。殷重發起四弘誓願。因發心故。一發一切發。發發心任。則是定慧平

等莊嚴。徧破三惑。知一切法皆安樂性。具圓妙道品。到事理彼岸。登菩薩正位。超八魔十魔。心心流入薩婆若海。知一切法本不思議。是謂上中根人。于第二真正發菩提心。具足十法乘也。若雖發心。心仍散動。未能登位。應念心體本來寂照。善巧調試。或以卽寂之照。令不沉沒。或以卽照之寂。令不浮散。浮沉病除。心體明淨。則能徧破三惑。證安樂性。具圓道品。到事理岸。登菩薩位。超越魔境。入薩婆若。知一切法本不思議。初發心時。便成正覺。是謂上下根人。於第三善

巧安心止觀。具足十法乘也。若雖以止觀安心。心仍未安。未得卽證寂照本體。必於所觀一念三千之境。猶存意解。未知當下卽空假中。應以四性而簡責之。其根利者。祇觀一念三千。無自生性。卽當悟入無生。無生則無不生。三諦圓顯。十乘具足。若根鈍者。破自則必計他。破他則必計共。破共必計無因。展轉破盡。方悟無生具足十乘。若猶未悟。必當度入相續假中。應觀此一念三千。爲前念不滅。後念續耶。爲前念滅。後念續耶。爲前念亦滅。亦不滅。後念續耶。爲前念非

滅非不滅後念續耶。若仍不悟必當度入相待假中。應觀此一念三千爲待有念而立耶。爲待無念而立耶。爲待亦有念亦無念而立耶。爲待非有念非無念而立耶。如此展轉簡責若能悟入無生無不生者則知一切諸法中悉有安樂性。具圓道品。到事理岸。登菩薩位。超越魔境。入薩婆若。知一切法本不思議便成正覺定慧莊嚴。是謂中上根人。於第四破法徧具足十法乘也。若雖約因成相續相待徧破諸惑仍未入者應思一切諸法中悉有安樂性。但除其病。不除

其法。如金錚去膜養珠。如郢匠去堊存鼻。那得一向破法。則破却成塞。今須善識通塞。若塞須破。若通須護。如聖王輪寶能破能安。由此識通塞故卽塞成通。煩惱卽菩提。菩提通達無復煩惱。生死卽涅槃。涅槃寂滅。無復生死。則能具足圓妙道品。到事理岸。登菩薩位。超越魔境。入薩婆若。知一切法本不思議。便成正覺定慧莊嚴。徧破三惑。是謂中中根人。於第五識通塞。具足十法乘也。若雖識通塞。仍未能卽塞成通。應觀現前一念三千性相。不可思議。卽是圓心念處。

孝親承事
五十一
一心念處。一切心念處。正勤策發緣如意定。而生五根。令其增長。而成五力。調停七覺趣。入正道。開圓三解脫門。而入秘藏。則爲到於事理彼岸。登菩薩位。超越魔境。入薩婆若。知一切法本不思議。便成正覺。定慧莊嚴。偏破三惑。證得諸法。皆安樂性。是謂中下根人。於第六調適道品。具足十法乘也。若雖調練。無作道品。而觀慧力弱。蓋障偏起。不能入位。必有無始事障未除。應審觀察。何障偏重。數數現起。兼以事行而對治之。理觀爲主。事行爲助。正助合行。不惜身命。誓

當尅證。終弗懈怠。由事理二治。能斷無始事理二幻障故。豁然證入。位相分明。則爲永超魔網。入薩婆若。知一切法本不思議。便成正覺。定慧莊嚴。偏破三惑。證安樂性。具足圓妙道品。是謂下上根人。於第七對治助開具足十法乘也。然對治助開之時。縱令鈍根。必皆有益。倘不知位次。起增上慢。以凡濫聖。招過不輕。故須深自簡察。爲究竟耶。爲分證耶。爲相似耶。抑亦僅僅小輕安耶。旣知位次。不起上慢。必有強軟諸魔。惱亂真修。須加安忍。不動不退。策進五品。而階十

信既階十信。六根清淨。得順道法。易生法愛。須離法
愛而入分真。入分真已。分得大理。大誓願。大莊嚴。大
智斷。大徧知。大道。大用。大權實。大利益。大無任。是謂
下根人。具修十法而成大乘。乘是大乘。遊于四方。直
至道場。自運功畢。運他不休。故此十乘妙觀。全性起
修。全修顯性。非橫非豎。橫豎該徹也。

附三慈體相

生緣慈有六種差別。一凡夫修生緣慈。成梵王福
以愛爲體。二外道修生緣慈。取梵天果。以見爲體。

三藏教二乘修生緣慈。對治瞋恚。作父母親屬想。
以世諦爲體。菩薩修生緣慈。廣行濟度。亦以世諦爲
體。然皆不起我人等執。依析空觀得成。四通教三
乘修生緣慈。皆了生空。依體空觀得成。緣六凡境亦
得以世諦爲體。五別教次第先修生緣慈。亦以世
諦爲體。不起我人等妄執。亦是依析體二空觀成。十信
析空。十六圓教一心修生緣慈。知十法界卽空。
任體空。假中。緣此卽空。假中之十界有情。一一皆作父母等
想。故以妙有爲門。得論六卽。

法緣慈有四種差別

一藏教二乘

生空故觀諸

衆生唯是四大五蘊不生墮惱隨力濟度以生空觀

爲體

菩薩雖未證空亦得修空

二通教三乘

了生本空法亦如

幻二乘隨力濟度菩薩弘誓徧周同以空觀爲體

三別教次第修法緣慈知空而不住空悟緣生法廣

度九界以從空入假觀爲體四圓教一心修法

緣慈知十界緣生之法卽空假中緣此卽空假中之

十界法知其無性故以妙無爲門得論六卽

無緣慈有二種差別一別教十回向不緣十界假

名之衆生不緣十界五蘊之法相惟緣中道佛性故

名無緣以相似中道爲體

若登初地後則與圓慈同

二圓人初

心卽了三千諸法一當體卽中中道之外更無別

法能所頓絕與拔難思得論六卽故有觀行無緣慈

乃至究竟無緣慈義只一慈體而論三慈故三慈皆

妙三慈皆論六卽如慈心三昧有種種差別悲喜

捨亦如是但約與樂名慈拔苦名悲見他得樂心

適悅名喜怨親平等一相心無繫著名捨心



80 1 2 3 4 5 6 7 8 9 90 1 2 3 4 5 6 7 8 9 100 1 2 3 4 5 6 7 8 9

各無絲以味中兼蒸歸與典圓意同。二四人時
 各之衆坐不絲十界正蘇之去餘歸絲申兼歸歸站
 心明丁三千滿去。一當豐用計中意之小夏到
 各無絲以味中兼蒸歸與典圓意同。二四人時
 各之衆坐不絲十界正蘇之去餘歸絲申兼歸歸站

三

